

【青囊經】

作者：郭璞，東晉人。

著作：葬書、青囊經。

《上卷》

上卷：敘述河圖五氣、洛書方位與陰陽二氣融合而化成天地之定位等學理，故謂之化始。

天尊地卑，陽奇陰偶，一六共宗，二七同道，三八爲朋，四九爲友，五十同途，闢闔奇偶，五兆生成，流行終始。

八體宏佈，子母分施，天地定位，山澤通氣，雷風相薄，水火不相射，中五立極，制臨四方，背一面九，三七居旁，二八四六，縱橫紀綱。

陽以相陰，陰以含陽，陽生於陰，柔生始剛，陰德宏濟，陽德順昌。是故陽本陰，陰育陽，天依形，地附氣，此之謂化始。

《中卷》

中卷：說出天地間形氣依附與方位配合而成一體的動力，故謂之化機。

天有五星，地有五行，天分星宿，地列山川，氣行

於地，形麗於天， 因形察氣， 以立人紀。

紫微天極，太乙之御，君臨四正，南面而治，天市東宮，少微西掖， 太極南垣，旁照四極。

四七爲經，五德爲緯，運乾坤輿，垂光乾紀，七政樞機，流通終始。

地德上載，天光下臨，陰用陽朝，陽用陰應，陰陽相見，福祿永貞， 陰陽相乖，禍咎踵門。

天之所臨，地之所盛，形止氣蓄，萬物化生，氣感而應，鬼福及人， 是故天有象，地有形，上下相須而成一體，此之謂化機。

《下卷》

下卷：說明天地間形氣方位與各種法則配合後的影響力，故謂之化成。

無極而太極也，理寓於氣，氣囿於地，日月星宿，剛氣上騰，山川草木，柔氣下凝，資陽以昌，用陰以成。

陽德有象，陰德有位，地有四勢，氣從八方，外氣行形，內氣止生， 乘風則散，界水則止。

是故順五兆，用八卦，排六甲，佈八門，推五運，定六氣，明地德，立人道，因變化，原終始，此謂之化成。